

Date – 04/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Naktuk a Sinlung Hills Council bial 12-a inthlan vote thlak tur atana ruahmanna siam chu peih fel a ni tawh.
2. MYC Chairman chuan Taiwan leh India-in hnathawk inthawn tawna thuthlung an neih chu Mizoram atanga tan a nih tur thu a sawi.
3. Uttarakhand-a Almora district-a bus chesualah mi 36 aia tlem lo an thi a, mi 19 in hliam an tuar
4. President Draupadi Murmu leh Prime Minister Narendra Modia chuan Uttarakhand-a bus chesual avanga vanduaiana thleng chu pawl an tih thu an sawi.

<><><>

SHC POLLS

Naktuk a Sinlung Hills Council bial 12-a inthlan vote thlak tur atana ruahmanna siam chu peih fel a ni tawh.

Mizoram State Election Commission Secretary Pu K. Laldinglana chuan naktuk a Sinlung Hills Council inthlan neih tur atana inbuatsaihna chu peih fel a nih tawh thu hi a sawi a. Akashvani Aizawl zawhna chhangin Mizoram State Election Commission Secretary chuan naktuk zing dar 7 atanga tlai dar 4 thleng ballot paper hmanga vote thlak a nih tur thu leh vote tla tur a tlak zawh a, vote thlakna ballot box-te chu bial tin hmunpui a kim taka phurh thlen a nih hnuah vote tla te hi chhiar nghal a nih tur thu a sawi a. Venhimna pawh District pathum a District Election Officer leh SP theuh-te ruahmanna ang a uluk taka ruahman a ni, a ti. Pu K. Laldinglana chuan Sinlung Hills Council inthlanna lo awm turah hian Polling station venhimna uluk zual ngai (critical polling station) 16 a awm thu leh Quick Response Team-te pawh uluk taka duty tura ruahmanna siam a nih thu sawiin Assam leh Manipur hnaih ramri-ah te pawh tul bik natna leh chhiat tawh tih lovah chuan veivak awm lo tura ramri khar vek a nih thu a sawi bawk.

Pu K. Laldinglana chuan vote nei zawng zawngte vote thlak turin a sawi a. Boruak muanawm tak hnuai a inthlanna kalpui a nih theih na'n political party, tlawmngai pawl leh mipui zawng zawng thawhpuina a ngen bawk a ni.

State Election Commission Secretary chuan Sinlung Hills Council-ah vote nei mipa-11,875 leh hmeichhia 11,914 an vaiin vote nei 23,789 an awm thu a sawi a. Inthlan hmasak ber, kum 2019 inthlan a vote nei mi 20,914 nena khaikhinin, vote nei punna zat chu 2,875 a nih thu a sawi bawk.

Sinlung Hills Council inthlanna chuhtute hi BJP-1, INC-12, MNF-10, ZPM-8, HPC-4 leh independent 14, an vaiin 49 an ni a. Bial 12 awma bial 6 hi Aizawl district-ah awmin Saitual district-ah bial 4 leh Kolasib district-ah bial 2 a awm bawk a ni.

District pathuma inthlan buaipuitute hnen atanga thu dawn danin inthlanna buaipuitu tur polling party-te hian an duty-na tur polling station an thleng kim vek tawh a. Aizawl district a duty turte hi chhun dar 12 khan an duty-na hmun tur chhuahsanin chawhnu lamah an thleng kim a. Polling station 19 a awm a, presiding officer 19 leh polling officer 38 awmin an vaiin 57 an ni. Saitual district bial 4 a inthlan buaipuitu leh venhim hna thawktute pawhin waviin tlai khan an duty-na tur hmun an thleng kim a. Kolasib district a Saipum leh Saiphai bial a duty tur polling official leh venhimna lam buaipuitute pawhin chawhnu dar 3 pelh khan an duty-na tur polling station an thleng kim a ni.

Inthlan campaign hi Pathianni tlai dar 4 khan a tawp a, political party leh candidate-te erawh chuan Inrinni tlai lam khan campaign hi an khar tawh a. Campaign chung hian election model code of conduct bawhchhiatna lian tham a awm thu an dawng lo niin state election commissioner Dr. H. Lalthlangliana chuan a sawi a ni.

<><><>

AIS, ZRF MEETS CM

Vaviin khan Chief Minister Pu Lalduhoma chuan a pisa-ah Mizoram All India Services Cadre hran a neih ve theih dan tur chungchang Mizoram IAS Association hruaitute, All India Services member dangte bakah Zoram Research Foundation hotute a sawipui.

Inkawmna-ah hian hemi chungchanga hmalakna lo awm tawhte sawi lan a ni a. Cadre hran neih that bikzia leh lukhawng a neih bikziate pawh sawi niin, sorkar tharah beiseina sang tak nen tha thar a hmalakna awmze nei lehzual kalpui an duh thu an sawi a. Chief Minister chuan, he thil hi a kaihhruai sorkar pawhin a duh leh a rualawhna a nih thute, nasa lehzual a bawhzui a duh thu te a lo hrilh a. Cabinet thutkhawmna-ah sawiho tura chhawp chhuah a lo tum tur thu a hrilh a ni.

He hunah hian Mizoram IAS Association atangin Pu Vanhela Pachuau, Pu C. Ropianga, Pu Lungmuana, Pu Lalzirmawia Chhange te an tel a. Indian Police Service atangin Pu Lalrokhuma Pachuau, Pu C. Dothanga, Pu P. C. Lallawmsanga, Pu Zoramawia leh Pu C. Laldina te telin; Zoram Research Foundation atangin Prof. Thangchungnunga leh Pu Rochamliaana te an tel a ni.

<><><>

MYC

Mizoram Youth Commission Chairman Pu Malsawmzuala Ralte chuan Taiwan leh India-in hnathawk inthawn tawna thuthlung an neih chu Mizoram atanga tan a nih tur thu a sawi.

Mizoram Youth Commission Chairman chuan Taiwan Ambassador pawh Mizoramahrawn kalin MYC pisa-ah a len luh thu a sawi a, he hmalakna bawhzui hian Mizo nula pahnih, Sarah Lalrohlui leh C. Vanlalruati te chu Taiwan-ah mandarin tawng zira an awm mek thu leh an thil zirte an thiam hunah Mizoramahrawn haw thla lehin Mizoram Youth Commission hnuai ah an thalai puite mandarin tawng an zirtir ve leh chhawn tur thu a sawi.

Akashvani Aizawl Correspondent nena inkawmna-ah an neihah hian Pu Malsawmzuala Ralte chuan Japan International Cooperation Agency (JICA) leh Mizoram Youth Commission-in thawhhona an neih dan tur pawh hetiang hian a sawi.

Mizoram Youth Commission-in hmalakna a neih hrang hrangte kan correspondent hnen atangin i lo ngaithla ang

Street Cities Special Economic Zone hnuaiia India ram chhunga Company lian tak takte hmalakna kal zelah Mizo thalaite hnathawh theih tur chu Mizoram Youth Commission pawh hriattir an ni a. He mi atan hian Mizo thalai 230 te'n dilna MYC-ah hian thehltut tawhin hmalak mek a ni a, MYC pawhin thalai eng emaw zat chu hnathawh thei tura thawnchhuah an beisei bawh niin a sawi.

He'ng bakah hian MYC leh The Lalit-te chuan thawhhona thuthlung ziakin Mizo nula eng emaw zat chuan spa therapy training an bei mek a, training an zawh ve leh India hmun hrang hranga Lalit hotel-ah te spa therapist hna an thawk tan dawn bawh a ni. Vishan foundation leh Mizoram Youth Commission-te thawhhona hnuaiia Aizawla MYC pisa-ah Mizo thalai 33-te training mekin an training zawh hunah hna pawh an hnuh nghal MYC chuan a beisei a, he training hi Lungleiah pawh kalpui tum mek a ni, a ti a ni.

<><><>

AMC

Aizawl Municipal Corporation chuan an thuneihna huam chhunga Restaurant, Hotel leh Hostel-te chu endik vat a nih tur thu vawiin khan an sawi.

He thu hi Aizawl Press Club-a AMC Board of Councillors thukhawmin hemi chungchanga hma la tura a din, Committee on Regulations of Restaurant, Hotel and Hostel-te'n Chanchinbu mite an kawmnaah sawiin, endikna an kalpui dawn avanga thingpui dawr, hotel leh hostel siamte chu November thla chung hun an pek thu leh hemi hnu lama dan zawm lo te chungah dan ang a action lak a nih tur thu an sawi a. Endikna an kalpui turah tehfung hrang hrang AMC hnuaiia inziaklut an nih leh nih loh chungchangte, an registration a nun leh nun loh bakah dawr neitu ten AMC phut anga signboard-ah an dawr license number an tar chhuak em tih te, bawlhhlawh an thlair fel leh fel loh chungchangte, eitur siam tute leh hotel leh hostel siam tuten faina leh thianghlimna an kalpui that leh that loh te an enfiah dawn tih an sawi a. November thla chawlhkar hnihna atanga hmalak tan an tum thu an sawi bawh.

<><><>

MINISTRY OFFICIAL

Vawiin khan Sorkar laipui a Ministry of Agriculture and Farmers Welfare Joint Secretary Pu Franklin L. Khobung Champhai a kuthnathawktute tana sawrkar hmalakna hrang hrangte a hmunah a enfiah.

Pu Franklin L. Khawbung hian chawhma lamah Champhai District Agriculture Office a tlawh a, Pu F Lalmalsawma, DAO Champhai leh a thawhpuite'n lo dawngsawngin, Department hnathawh dan leh kalphung te an lo hrilhfiyah a, hemi hnu hian Irrigation & Water Resources Office a tlawh

bawk. Pu Franklin L Khobung hian Agriculture Department in FOCUS kaltlanga an hmalakna Integrated Farming System Tlangram zau Hmunhmeltha a mi chu tlawhin loneitute hnathawh dan leh an hmalakna te a enpui a. Loneitute hian Integrated Farming System hmanga an hmasawna leh mamawh an neihte a hnenah hian an lo thlen bawk. Pu Franklin L Khobung hian District Horticulture Office, Champhai pawh tlawhin, Department hmalakna hrang hrang a hmunah kalin an enpui a, heng zingah hian sapthei sawngbawlina tur Cold Storage Complex, New Champhai ami chu a tel a ni.

Hemi hnu hian Pu Franklin L Khobung hian Champhai Winery a tlawh a, an hmunhna leh an hmalaknate a enpui hnuah Winery hruaitute a kawm nghal a. Changlung zawk a grape tui siam chhuah dan tur leh awmze nei zawk a hralh chhuah dan tur te an sawiho a ni. Hemi hnu hian Tlangsam a Turmeric Processing Plant a tlawh nghal bawk a ni.

<><><>

UTTARKHAND BUS ACCIDENT

Uttarakhand-a Almora district-a bus chesualah mi 36 aia tlem lo an thi a, mi 19 in hliam an tuar. Thudawn danin bus hi Sult area-a chesual niin luiah a tla lut a. Gaulikhal atanga Ramnagar pana tlan niin bus ah hian mi 51 an chuang a ni.

Kan correspondent report i lo ngaihthlak chhunzawm ang.

(VC)

President Draupadi Murmu leh Prime Minister Narendra Modia chuan vanduinah thleng chu pawh an tih thu an sawi a. President Murmu-i chuan mitthite chhungte a tawrhpuh thu leh hliam tuarte pawh dam thuai turin duhsakna a hlan a ni.

Prime Minister Narendra Modia pawhin chhiatna thleng chu pawh a tih thu sawiin mitthi chhungte hnenah cheng nuai 2 theuh PM National Relief Fund atangin pek an nih tur thu a sawi a. Hliam tuarte pawh cheng sing theuha kan an ni ang a ti bawk.

<><><>